

我上愛唱的囡仔歌

沈鈴惠 撰

各位評判老師、各位好朋友，逐家好，我是編號第 00 號，今仔日欲演說的題目是「我上愛唱的囡仔歌」

佇我細漢的時陣，阿爸講：「我上愛綴伊行上行落，伊就牽我的手若行若唱歌予我聽，我就若行頭若晃，若搖尻川花，喙裡呷呷喔喔，毋知咧唱啥物，毋過感覺有夠古錐」。阿母講：「我遺傳著阿爸愛唱歌，佇伊腹肚內的時陣，若佇咧聽音樂，就共伊的腹肚大細下踢，彼個時陣，就感覺我大漢會是一個愛唱歌的囡仔」。

唱歌是我生活的針油，抑是我上快樂的代誌，有當時，當頭白日閣會做眠夢，掠準家己是一个世界有名的歌星，就大聲一直唱一直唱，唱這首我上愛唱的囡仔歌，「西北雨」。

西北雨直直落，鯽仔魚欲煮某，鮎鯀兄拍鑼鼓，媒人婆仔土虱嫂，日頭暗尋無路，趕緊來火金姑，做好心來照路，西北雨直直落。

這歌詞配合著咱台灣熟人的天氣，因為四面倚海，若佇七、八月仔，常在佇落雷陣雨，彼雨予人閃袂赴，無張持就來閣真雄，雨足大點，親像獅、豹、虎遐呢兇狂，霆雷公兼爍爍，抑有人愛講笑諛共講是三八雨，往過農業社會有一句俗諺語講：「西北雨，落袂過田岸」，現代人就共講：「西北雨，落袂過車路」。

這首趣味的童謠，描寫兩段故事

第一葩：共小動物共比論做人，當做是家己的親人，有扮做媒人婆的土虱嫂佢鯽仔魚大兄來進行迎親，一路上歡喜的景致，落大雨親像炮仔聲劈哩啪啦佢鮎鯪拍鑼鼓的鑼鼓聲誠鬧熱，雖然行到日頭落山，天色暗眠摸，抑有好心的火金姑，來替佢擲火鬥照路，予這場迎親的喜慶，會當圓滿完成。

第二葩：講著囡仔的惻隱之心，描述西北雨落甲誠大，白鴿鷺趕緊欲轉去厝，盤過山嶺，行過溪河，兇兇狂狂煞來跋倒，抑揣無欲轉去的路，而且天色嘛漸漸暗矣，這時陣，佇囡仔的心靈，祈禱著土地公佢土地婆，大發慈悲來幫助佢會當平安轉去厝。

借著這一首囡仔歌，予阮囡仔的心靈，對四箍輾轉的事事項項，充滿歡喜的幻想、想法佢宇宙萬物的各種變化。佇我好心情抑是鬱卒、傷心的時，這塊歌予我安慰，綴著歌聲，消啟我心內無爽快的代誌，因為愛唱這塊歌，予我佢誠濟愛唱歌的同學，成做好朋友，予阮有全款的興趣佢話題，逐工鬥陣唱著愛唱的歌-----西北雨。

我的演說到遮，感謝逐家